

藥性通攷

五

太醫院傳卷之五

蒼朮

味甘溫氣辛烈燥胃強脾發汗除濕能昇發胃中陽氣消
腫滿辟惡氣又能總解痰火氣血濕食六鬱及脾濕下流
腸風帶濁燥結多汗者忌用出茅山堅小有硃砂點者良
糯米泔浸焙乾同芝麻炒以制其燥二朮皆防風地榆爲
使主治畧同第有止汗發汗之異古方本草不分蒼白陶
隱君言有兩種始各施用東垣曰雄壯上行能除濕下安
太陰使邪氣不傳入脾許叔微云蒼朮能治水飲之滯囊
蓋燥脾以去濕崇土以填科口用蒼朮一觔大棗二十五

枚去皮搗油麻半兩水二錢研濾汁和丸名神木丸丹溪
曰實脾土燥脾濕是治痰之術辟亦切嵐瘴邪惡鬼氣暑
濕月焚之佳夷堅志云有士人遊西湖遇一女子明艷動
人重幣求之不得又五年重尋舊遊悵然空返忽遇女子
士欣然並行過旅館畱半歲將議偕道女曰自君去憶念
之苦感疾而亡非人也但君侵陰氣深當暴瀉宜服平胃
散以補安精血士驚惋曰藥味皆平何得取效女曰中有
蒼朮除邪氣爲上品也散風寒濕爲治痿要藥陽明虛則
宗筋縱弛帶脉不引故痿瘳蒼朮陽明經藥經曰治痿獨
取陽明合黃栢爲二妙散加牛膝爲三妙散丹溪言諸醫

皆因傳化失常氣不得昇降病在中焦將欲昇之必先降之越鞠丸用蒼朮香附蒼朮能引入諸經踈泄陽明之濕通行斂瀉香附乃陰口快氣之藥一昇一降故鬱散而平帶濁赤者濕傷血分從心小腸來白者濕傷氣分從肺大腸來並有寒熱二症亦有因痰而帶濁者宜二陳湯加二朮昇柴南陽文氏值亂逃壺山饑困有人教餌尤遂不饑數十年後歸家顏色更少氣力轉健朮一名山精一名山薑導仙錄曰子欲長生當服山精子欲輕翔當服山薑昂按蒼朮善發又安能長遠服食文氏仙錄之說要亦方書誇張之言也

甘菊花

味兼甘苦性稟平和備受四氣冬苗春葉夏莖秋花飽經霜露得金水之精居多能益金水二臟以制火而平木木平則風息火降則熱除故能養目血去翳膜與枸杞相對蜜丸久服永無目疾又治頭目眩暈風熱散濕痺遊風以草辨味甘者入藥花小味苦者名苦蕒非真菊也牧童閒談云真菊延齡野菊瀉人白朮枸杞地骨皮爲使黃者入陰分白者入陽分紫者入血分可藥可餌可釀可枕仙經重之○或問菊花乃眼科之妙藥能去風明目世人每用白菊花豈黃者無用乎曰菊花雖有黃白其性相同黃者

取中州之氣能入脾經清胃火其功比白者更有大功也
世人獨取白菊者乃不能深知藥性之人也

五味子

性溫五味俱備入五臟補肺腎瀉精氣皮其肉酸核中苦
辛都有鹹味酸鹹爲多故專收斂肺氣而滋腎水氣爲水
母經曰肺欲收急食酸以收之好古曰入手太陰血分足
少陰氣分益氣生津肺主氣收斂故能益氣益氣故能生
精夏月宜常服以瀉火而益金猶能補虛明目強陰瀉精
仲景入八味丸加之補腎蓋內核似腎象形之義也退熱
斂汗止嘔住瀉寧嗽定喘感風寒而喘嗽者當清降宜三

陳湯及蘓子降氣湯水氣逆而喘嗽者宜小青龍湯半夏
茯苓湯氣虛病久而喘嗽者宜人參五味子除煩消消水
腫解酒毒收耗散之氣瞳子散大嗽初起脉數有實火者
忌用丹溪曰五味收肺氣非除熱乎補腎非煖水臟乎乃
火熱嗽必用之藥寇氏所謂食之多虛熱者收補之驟也
閔守泉每晨吞北五味三十粒固精氣益五臟北產紫黑
者良入滋補藥蜜浸蒸入勞嗽藥生用俱槌碎核南產色
紅而枯若風寒在肺宜南者薤蓉爲使惡萎黴煨膏良

蘓薄荷

味辛氣溫輕清之藥能散風熱可昇可降發汗搜肝氣而

抑肺盛消散風熱清利頭目治頭痛頭風中風失音痰嗽
口氣語瀉舌胎含漱眼耳咽喉口齒諸病辛香通竅而散
風熱皮膚癢癰瘰癧瘡疥驚熱凡小兒治驚藥俱宜用薄
荷湯調骨蒸破血止痢能治血痢血痢者凝滯也薄荷辛
能散涼能清也虛人不宜多服能發汗踈表夏月多服泄
人元氣蘓產氣芳者良薄荷者猫之酒也犬乃虎之酒也
蜈蚣鷄之酒也桑椹鳩之酒也茵草者魚之酒也食之皆
醉被猫傷者薄荷汁塗之卽愈

連翹

味苦微寒輕宜散結瀉火昇也浮也形似心實似蓮房有

辨入心故入手少陰厥陰心包氣分而瀉火兼除手足少
陽三焦胆手陽明經大腸氣分濕熱散諸經血凝氣聚營
氣壅遏衛氣鬱滯故成瘡腫利水通經殺虫止痛消腫排
膿皆結者散之凡腫而痛者爲實邪不痛爲虛邪腫而赤
者爲結熱腫而不赤爲留氣停痰爲十二經瘡家聖藥經
曰諸瘡痛癢皆屬心火故必用連翹也

天冬

味其苦大寒入手太陰氣分瀉肺火補腎水潤燥痰清金
降火益水之上上源肺爲腎母下通足少陰腎經滋腎潤
燥止渴消痰蒙荃曰腎主津液燥則凝而爲痰得潤劑則

痰化所謂治痰之本也澤肌膚利二便治肺肺痿肺癰肺
痿者感於風寒咳嗽短氣鼻塞胸脹久而成痿有寒痿熱
痿二症肺癰者熱毒蘊結咳吐膿血胸中隱痛痿重而癰
稍輕治痿者宜養血補氣保肺清火治癰宜瀉熱豁痰開
提昇散癰爲邪實痿爲正虛不可悞治吐膿吐血痰嗽喘
促消渴嗑乾煩渴飲多食善饑爲消渴由火盛津枯足下
熱痛虛勞骨蒸陰虛火動之症然性冷利胃虛無熱及瀉
者忌用取肥大明亮者去心皮酒蒸地黃貝母爲使惡鯉
魚二冬熬膏並良天冬滋陰助元消腎痰麥冬清心降火
止上欬也

麥冬

味甘微苦寒清心潤肺入太陰氣分強陰益精瀉熱除煩
微寒能瀉火火退則金清金旺則水生陰得水養則火降
心寧而精益消痰止嗽午時前嗽多屬胃火宜芩連梔栝
知母石羔午後嗽及口輕夜重者多屬陰虛宜五味麥冬
知母四物湯行水生津肺清則水道下行故治浮腫火降
則腎氣上騰故又治消渴治吐血胃火上衝則嘔宜麥冬
又有因寒因食因痰因虛之不同也又治痿癱手足緩縱
曰痿癱陽明濕熱上蒸於肺故肺熱葉焦發爲痿癱經疏
曰麥冬實陽明胃經之正藥客熱虛勞脉絕短氣同人參

五味名生脉散蓋心主脉肺朝百脉補肺清心則氣充而脉復又有脉絕將死者服此能復生之夏月火旺灼金服之尤宜東垣曰人參其寒瀉火熱而益元氣麥冬苦寒滋燥金而清水源五味酸温瀉丙火而補庚金益五臟之氣也肺痿吐膿血熱妄行經枯乳閉明目悅顏益水清火但性寒而泄氣弱胃寒人忌用肥大者良去心用入滋補藥酒浸制其寒地黃車前爲使惡欬冬畏苦參青箱木耳

牛膝

味苦酸而平入足厥陰少陰經藥能引諸藥下行酒蒸則其酸而温益肝腎強筋骨肝主筋腎主骨治腰膝骨痛足

痿筋攣下行故理足補肝則筋舒血行則痛止陰痿失溺
筋衰則陰痿腎虛則失溺久瘞下痢傷中少氣以上皆補
肝腎之功生用則散惡血破癥結血行則結散又治心腹
諸痛淋痛尿血熱結膀胱溺瀉而痛白淋氣淋便瀉餘瀝
勞淋房勞卽發冷淋寒戰後溲便出如膏石淋精結成石
尿血卽血淋也色鮮者心與小腸實熱色瘀者腎膀胱虛
冷張子和曰石淋乃肝經移熱於胞中日久熬煎成石非
腎與小腸病也大法治淋宜通氣清心平火利濕不宜用
補恐濕熱得補增劇也牛膝淋症要藥血淋尤宜用之又
有中氣不足致小便不利者宜補中益氣經所謂化而能

出是也忌用淋藥通之經閉難產下行之效悞用墮胎喉痺齒痛引火下行癰腫惡瘡金瘡折傷以上皆散惡血之功出竹木刺者搗爛抱之卽出然性下行而滑竅變遺失精及脾虛下陷因而腿膝腫痛者禁用出西山及懷慶府長大肥潤者良下行生用入滋補藥酒浸蒸惡龜甲畏白前胡忌牛肉之類

三稜

味苦氣平色白屬金入肝經血分破血中之氣兼入脾經散一切血瘀氣結瘡硬食停積聚老塊堅積消腫止痛通乳墮胎功近香附而力峻虛者慎用色黃體重若鯽魚而

小者良醋浸炒或麪裹煨用從血藥則治血從氣藥則治氣然須加入健脾補氣藥中良昔有人患癥癖而死遺言開腹取之得病塊如石文理五色削成刀柄因爲三稜柄消成水乃知此藥可療癥癖也

黃芩

味苦入心性寒勝熱瀉中焦實火除脾家濕熱治澀痢腹痛便血曰澀寒痛忌用凡腹痛有寒熱虛實食積痰血痰濕之不同也寒宜溫熱宜清虛宜補實宜下食宜消導痰血宜行散痰濕宜化痰利濕痛時手不可按者爲實痛按之痛止者爲虛痛也又治寒熱往來黃疸五淋血閉氣逆痞

瘍及諸失血消痰利水解渴安胎養陰退陽補膀胱水酒
炒則上行瀉肺火利胸中氣治上焦之風熱濕熱丹溪曰
黃芩上中二焦藥火嗽喉腥目赤腫痛過服損胃血虛寒
中者禁用黃明者良中虛者名枯芩卽片芩瀉肺火清肌
表之熱內實者名條芩卽子芩瀉大腸火補膀胱水上行
酒炒瀉肝胆火猪胆汁炒山茱龍骨爲使畏丹皮丹砂

知母

味辛苦氣寒滑上清肺金而瀉火瀉胃熱膀胱邪熱腎命
相火下潤腎燥而滋陰入二經氣分黃栢入二經血分故
二藥必相須而行又能消痰定嗽止渴安胎莫非清火之

用治傷寒煩熱產勞骨蒸燥渴虛煩久瘧下痢治嗽者清
肺火也治渴者清胃火也退骨蒸者瀉腎火也又利二便
消浮腫然苦寒傷胃而滑腸多服令人瀉得酒良上行酒
浸下行鹽水拌忌鐵然氣體虛損之火忌用必須入於八
味地黃湯中方可平穩矣

龍膽草

味大苦大寒沉陰下行益肝胆而瀉火相火寄於肝胆有
瀉無補瀉其邪熱卽所以補之也兼入膀胱腎經除下焦
之濕熱與防已同功酒浸亦能外行下行治骨間寒熱驚
癩邪氣時氣溫熱熱痢黃疸寒濕脚氣咽喉風熱赤睛努

肉癰疽瘡疥過服損胃甘草水浸一宿暴用小豆貫衆爲
使惡地黃

遠志

味苦辛氣溫入手少陰心經聰耳明目利九竅長肌肉助
筋骨治迷惑善忘驚悸夢遺能通腎氣上達於心安神益
智補精壯陽能交心腎○時珍曰遠志入足少陰腎經非
心經藥也強志益精故治健忘益精與志皆藏於腎腎精
不足則志氣衰不能上通於心故健忘夢遺也每用去心
用甘草浸一宿用畏珍珠藜蘆得茯苓龍骨良又能治一
切惡瘡癰疽酒煎服良凡癰疽之症皆從七情憂鬱惱怒

而得也遠志辛能散鬱故瘡易散也然散鬱之藥亦多矣
何獨遠志乎蓋亦補腎之力耳

何首烏

味苦甘氣溫堅腎補肝益血收斂精氣添精益髓養血祛
風治風先治血血活則風散強筋骨烏髭髮故名首烏久
服令人有子爲滋補良藥癆瘦崩帶瘡痔瘰癧癰腫諸病
止惡瘡有赤白二種夜則藤交一名交藤有陰陽交合之
象赤雄入血分白雄入氣分以大者良小者不如地黃之
功當使赤白各半米泔浸竹刀刮皮切片用黑豆與首烏
均勻鋪柳甑入砂鍋九蒸九晒用茯苓爲使忌諸血無鱗

魚葉蕨葱蒜鐵器單用無功必須加入補氣血藥中方有
功效用赤白首烏各一觔黑豆拌九蒸晒茯苓半觔乳拌
當歸枸杞兔絲各半觔俱酒浸同首烏第七次蒸至第九
次破故紙四兩黑芝麻炒蜜丸並忌鐵器昂按地黃首烏
皆君藥也故六味丸以地黃爲君七寶丹以首烏爲君各
有配合未可同類而共施也

熟地黃

味甘微溫入手足少陰厥陰經滋腎水補真陰填骨髓生
精血聰耳明目耳爲腎竅目爲肝竅目得血而能視耳得
血而能聽黑髮烏髭治勞傷風痺胎產百病爲補血之上

劑丹溪曰產前當清熱養血爲主產後宜大補氣血爲主
雖有雜病亦當從治之若不善用之多有風寒未解瘀血
未盡妄施大補反致大害者不可不察書云男子多陰虛
宜熟地女子多血熱宜生地然亦不必俱論要看人之虛
實而用之也以好酒拌砂仁末浸蒸晒九次用地黃性寒
得酒與火與日則性溫得砂仁則利氣且能引入丹田六
味丸用之爲君尺脈弱者加桂附所謂益火之原以消陰
翳也尺脈大者加知栝所謂壯水之主以治陽光也凡有
小兒面黃肌瘦髮立好吃泥土火炭之病用地黃一觔酒
煮熟與兒吃之自然肥腴矣今人常言膩膈生痰者乃不

通之人也地黃每用至一二兩又能生津止渴大補腎水
水昇則火自降水火既濟則百病不生矣又何疑乎

生地黃

味其苦氣大寒入心腎瀉丙火小腸爲丙火心與小腸相
表裏導赤散與木通同用也又能清燥金胃大腸火消痰
通經平諸血逆治吐衄崩中唾血者血隨唾出咯血者隨
痰咯出或帶血絲出腎經及肺經白兩脇逆上吐出者屬
肝經衄血者血溢於腦從鼻而出咳血者咳出痰內有血
並屬肺經吐出嘔出成盆成碗者屬胃經經漏不止曰崩
血熱則妄行宜以此涼之虛人忌用用乾地黃可也傷寒

陽強痘症大熱多服損胃生掘鮮者搗汗飲之或用酒製則不傷胃生則寒乾則涼熟則溫故分爲三條以便施用也

威靈仙

味辛辣微鹹氣溫屬木其性善走能宣踈五臟通十二經絡治中風頭風頭痛頑痺癢積聚痰水宿膿黃疸浮腫大小腸秘風濕痰氣一切冷痛性極快利積疴不痊者服之有捷效然踈泄真氣弱者慎用和砂仁砂糖醋煎治諸骨硬但根鬚數百條長者二尺餘色深黑俗名鐵腳威靈仙忌茗麵湯凡濕熱流於肢節之間腫屬濕痛屬熱汗多

屬風麻屬氣虛木屬濕痰死血十指麻木亦是胃中有濕
死血脾主四肢故也痛風當分新久新痛屬寒宜辛溫藥
久痛屬熱宜清涼藥河間所謂暴非熱久病非寒是也大
法宜順氣清痰搜風散濕養血去瘀爲要威靈仙傳曰一
人手不遂數十年遇新羅僧曰得一藥可治入山求之乃
靈仙也服之而愈

天麻

味辛溫入肝經氣分益氣強陰通血脈強筋骨疎痰氣治
諸風眩暈頭旋眼黑語言不遂風濕痛痺小兒驚癇諸風
眩暈皆屬肝木肝病不能榮筋故見眩暈天麻入厥陰而

治諸疾肝氣平和諸疾自瘳凡血液衰少及類中風者忌
用風藥能燥血故也凡風藥中須兼養血藥以制其燥也
養血藥或兼搜風藥宜其滯也古云治風先治血血行風
自滅其根類黃瓜莖名赤箭有風不動無風反搖一名定
風草明亮堅實者佳濕紙包煨熟切片酒浸一宿焙乾用

秦艽

味苦辛散風去濕去腸胃之熱益肝胆之氣養血榮筋治
風寒濕痺風藥中潤劑散藥中補劑經曰風寒濕三氣雜
至合而爲痺風勝爲行痺寒勝爲痛痺濕勝爲着痺痺在
於骨則體重在脉則血滯在筋則拘攣在肉則不仁在皮

則寒通身攣急血不榮筋虛勞骨蒸時珍曰手足陽明經藥兼入肝胆陽明有濕則手足酸痛寒熱有熱則日晡潮熱骨蒸聖惠方治急勞煩熱秦艽柴胡各一兩甘草五錢爲末每服三錢治小兒骨蒸潮食減瘦弱秦艽炙甘草各一兩每服一二錢薄荷五錢更妙秦艽又能治疽黃酒毒腸風瀉血口禁牙痛齒下齧屬手陽明大腸經張潔古曰秦艽能去下牙痛及本經風濕濕勝風淫之症利大小便牛乳點服兼治黃疸煩渴便赤形作羅紋相交長黃白左紋長者良菖蒲爲使畏牛乳

木賊草

味甘苦性溫中空輕揚與麻黃同形性亦能發汗解肌昇散火鬱風濕入足厥陰少陽血分益肝胆治目疾退翳膜翳乃肝邪鬱遏不能上通於目也又能治疝痛脫肛腸風痔漏赤痢崩中諸血病之藥也

浮萍草

味辛散輕浮入肺經達皮膚能發揚邪汗丹溪曰浮萍發汗勝於麻黃止癢癢消渴搗汗服生於水上又能下水氣利小便治一切風濕癰疽浮萍一味蜜丸酒服治三十六種風濃煎汁浴治惡疾瘡癩遍身燒烟辟蚊紫背者良。

柴蘇

味辛入氣分色紫入血分香溫散寒通心利肺開胃益脾
發汗解肌和血下氣寬中消痰祛風定喘止痛安胎利大
小腸解魚蟹毒多服泄人真氣同陳皮砂仁行氣安胎同
藿香烏藥溫中止痛同香附麻黃發汗解肌同川芎當歸
和血散血同桔梗枳椇利膈寬腸同葡萄子杏仁消痰定喘
同木瓜厚朴散濕解暑治霍亂脚氣氣香者良宜橘皮忌
鯉魚。蘇子與葉同功潤心肺尤能下氣定喘止咳消痰
利膈寬腸溫中開鬱有蘇子降氣湯蘇梗下氣稍緩虛者
宜之葉發汗散寒梗順氣安胎子降氣開鬱消痰定喘表
弱氣虛者忌用葉陽滑氣虛者忌用子炒研用

荆芥

味辛苦能溫能散入肝經氣分兼行血分其性昇浮能發汗又云止冷汗虛汗散風濕清頭利咽喉治傷寒頭痛中風口噤身強項直口面喎斜目中黑花其氣溫散能助脾胃消食氣香入脾通利血脈治吐衄腸風崩中血痢產風血暈產後去血過多腹中空虛則自生風故常有崩運之患不待外風襲之也荆芥最能散血中之風華佗愈散用荆芥三錢微焙爲末豆淋酒調服或童便服諸家云甚妙療癰瘡腫清熱散瘀破結解毒結散熱清則血涼而毒解爲風病血病諸家聖藥荆芥功本治風又兼治血者以其入

於風木之藏卽是藏血之地也。○李士材曰風在皮裏膜外荆芥主之非若防風能入骨肉也連穗用穗在於巔故善昇發治血炒黑用凡血藥炒黑者以黑勝紅也反魚蟹河豚驢肉然生用則引歸經炒黑則引血歸經也

麻黃

味辛溫微苦入足太陽膀胱兼走手少陰陽明心大腸而爲肺家耑藥發汗解肌去營中寒邪衛中風熱調血脈通九竅開毛孔治中風傷寒頭痛溫痺咳逆上氣痰哮氣喘赤黑斑毒胃熱一日班症表虛不得再汗非便閉亦不可下只宜清解其熱毒風癢痺皮肉不仁目赤腫痛水腫風

腫過劑則汗多亡陽夏月禁用發汗用莖去節煮十餘沸
掠去浮沫或用醋湯畧泡曬乾備用亦有用蜜炒者止汗
用根節厚朴白微爲使惡辛夷石羔然吐血之人忌用氣
體虛弱之人並孕婦忌用雖無時出汗爲自汗屬陽虛夢
中出汗爲盜汗屬陰虛用麻黃根蛤粉粟米等分爲末袋
盛撲之汗自止矣

菖蒲

味辛苦能溫能散補肝益心開心孔利九竅明耳目發音
聲去濕逐風除痰消積開胃寬中療噤口毒痢噤口雖屬
脾虛亦熱閉胸膈所致用失之溫山藥失之閉唯參苓白

米散加菖蒲米飲下胸次一開自然思食風脾驚癇崩帶
胎漏消腫止痛解毒殺虫根瘦節密一寸九節者良去毛
微炒用秦艽爲雞麻黃忌飴糖羊肉鐵器乃剋伐之藥氣
虛體弱之人慎用

桔梗

味苦辛氣平無毒色白屬金入肺氣分瀉熱兼入手少陰
心經足陽明胃經開提氣血表散寒邪清利頭目咽喉胸
膈滯氣凡痰壅喘促鼻塞肺氣不利目赤喉痺喉痛兩少
陰火齒痛陽明風熱口瘡肺癰乾咳火鬱在肺胸膈利痛
火鬱上焦下痢腹痛腹滿腸鳴肺火鬱於大腸並宜苦桔

梗以開之爲諸藥舟楫載之上浮能引苦泄峻下之劑至
於至高之分成功。或問既上行而又能下氣何也肺主
氣肺金清濁氣自下行耳又能養血排膿補內漏故治肺
癰枳桔湯治胸中痞滿不痛取其通肺利膈下氣也其桔
湯通治咽喉口舌諸病取其苦辛散寒其平除熱也宋仁
宗加荆芥防風連翹遂名如聖湯王好古加味其桔湯失
音加訶子聲不出加半夏上氣加陳皮涎嗽加知母貝母
欬濕加五味酒毒加葛根少氣加入參嘔加半夏生姜吐
膿血加紫菀肺痿加阿膠胸膈不利加枳殼痞滿加只實
目赤加枝子大黃面腫加茯苓膚痛加黃芪發斑加荆防

疫毒加牛蒡大黃不得眠加枝子昂按觀海藏所加則川藥之大較亦可識矣去浮腫用米泔浸微炒用畏龍膽白芨忌豬肉

栝樓仁俗作瓜萋

味甘苦氣寒瀉火潤肺滑腸止血治熱痰能清上焦之火使痰氣下降爲治嗽要藥肺受火逼失下降之令故生痰作嗽又能蕩滌胸中鬱熱垢膩生津止渴丹溪曰消渴神藥清咽利腸通大便焙研酒調或米飲下治小便不通通乳消腫治結胸胸病仲景小陷胸湯用之又云少陽症口渴者小柴胡湯以此易半夏酒黃熱痢二便不通炒香酒

服止一切血瀉者忌用實圓長如熟柿子扁多脂去油用
枸杞爲使畏牛膝乾漆惡乾姜反烏頭

天花粉 即瓜蒌根

味酸苦微甘氣寒降也能瀉火潤燥生津滑痰解渴生肌
排膿消腫行水通經止小便利膀胱熱解則水行而小便
不數治熱狂時疾胃熱疸黃口燥唇乾腫毒發背癰疽乳
癰瘡痔脾胃虛寒者禁用宜虛熱之人此藥大寒大冷之
藥恐傷胃氣用之必加健脾養胃之藥中可也

海帶 昆布

海帶下水消癭功同海藻似海藻而粗柔軟而長○昆布

功同海藻而少滑性雄治水腫癭瘤陰癢膈噎病用時洗
去鹹味用

羌活

味辛苦性溫氣雄而散深薄上昇入足太陽膀胱以理遊
風兼入足少陰厥陰氣分瀉肝氣搜肝風小無不入大無
不通治風濕相搏本經頭痛同川芎治太陽少陰頭痛凡
頭痛多用風藥者以巔頂之上唯風藥可到也又能治中
風不語頭旋目赤散肌表入風之邪利周身百節之痛爲
卻亂反正之主藥若虛_血頭痛遍身痛者此屬內症並宜忌
之

獨活

味辛苦微溫氣緩善搜入足少陰氣分以理伏風治本經傷風頭痛頭暈目眩宜與細辛同用風熱齒痛瘰癧濕痺項背強直手足反張曰瘰濕流關節痛而煩曰濕痺奔豚痼瘕腎積曰奔豚風寒濕客於腎家所致瘕瘕亦然有風不動無風動又名獨搖草故治風本經云獨活一名羌活古方惟用獨活後人云是一類二種遂分用以形虛大有如鬼眼節踈色黃者爲獨活色紫節密氣猛烈者爲羌活並出蜀漢又云自西羌來者名羌活故又名翻王使者余採諸家所分經絡主各註以便施用

防風

味辛甘微溫昇浮爲陽搜肝瀉肺散頭目滯氣經絡留濕
主上部見血用之爲使亦能治崩上焦風邪頭痛目眩脊
痛項強周身盡痛太陽經症得葱白能行周身又行脾胃
二經爲去風除濕之要藥散目赤瘡瘍若血虛瘰急頭痛
不因風寒內傷頭痛泄瀉不因寒濕火昇發嗽陰虛盜汗
陽虛自汗者並禁同黃芪芍藥又能實表止汗合黃芪白
朮名玉屏風散固表聖藥黃芪得防風而功益大取其相
畏而相使也黃潤者良上部用身下部用梢畏葶藶惡乾
姜白歛芫花殺附子毒

藁本

味辛溫雄狀爲犬陽經風藥寒鬱本經頭痛連腦者必用之凡巔頂痛宜藁本防風酒炒身柴又治督脉爲病脊強而厥督脉並太陽經貫脊又能下行去濕治婦人疝瘕陰寒腫痛腹中急痛皆太陽寒濕胃氣泄瀉粉刺酒釀和白芷搽之良根紫色芎藭而輕虛氣香味麻

葛根

味辛溫性平輕揚昇發入陽明經能鼓胃氣上行生津止渴風藥多燥葛根獨能止渴者以其能昇胃氣入肺而生津耳兼入脾經開腠發汗解肌退熱爲治脾胃虛弱泄瀉

之聖藥療傷寒中風陽明頭痛血痢溫瘧腸風痘疹又能
起陰氣散鬱火解酒毒利二便殺百藥毒多用反傷胃氣
恐昇散太過也生葛汁大寒解溫病大熱吐衄諸血雖能
發痘疹然斑疹已見之後不可更服昇麻葛湯恐表虛反
增斑爛也

昇麻

味辛微苦入足陽明太陰引經藥亦入手陽明太陰大腸
肺表散風邪引葱白散手陽明風邪同葛根能發陽明之
汗引石羔能止陽明頭痛齒痛昇發火鬱能昇陽氣於手
陰之下引其溫之藥上行以補衛氣之散而實其表柴胡

引少陽清氣上行昇麻引陽明清氣上行故補中湯用爲
佐使若下元虛者用此昇之則下元愈虛又當慎用又治
時氣毒癘頭痛寒熱肺痿吐膿下痢後重後重者氣滯也
氣滯於中必上行而後下降有病大小便秘者用通利藥
罔效重加昇麻而反通也丹溪曰氣昇則水自降經曰地
氣上爲雲天氣下爲雨天地不交則萬物不通也又治久
泄脫肛崩中帶下足寒陰痿目赤口瘡痘瘡風熱瘡癰百
草毒吐蠱毒殺精鬼陰虛火動者忌用裏白外黑緊實者
良名鬼臉升麻去鬚蘆用

白芷

味辛散風溫除濕芳香通竅而表汗行手足陽明大腸胃
入手太陰而爲陽明主藥又治頭目昏痛着稜骨痛牙痛
鼻淵目癢泪出面疔癩疵皮膚燥癢三經風熱之病及血
崩血閉腸風痔瘻癰疽瘡瘍三經熱濕之病活血排膿生
肌止痛解砒毒蛇傷先以繩扎傷處酒調下白芷末五錢
自愈人家種白芷能辟蛇又治產後傷風血虛頭痛然其
性昇散血熱有虛火者禁用色白氣香者佳或微炒用當
歸爲使惡旋覆花

前胡

味辛以暢肺解風寒其以悅脾理胸腹苦泄厥陰肝經之

熱寒散太陽之邪性陰而降功耑下氣氣下則火降而痰消矣氣有餘便是火有火則生痰矣又能除實熱痰熱哮喘咳嗽嘔逆痞膈霍亂小兒痺氣有推陳致新之績明目安胎無外感者忌用皮白肉黑味甘氣香者良半夏爲使惡皂莢忌火按柴胡前胡均是風藥但柴胡性昇前胡性降爲不同也肝胆經風痰非前胡不能除也

細辛

味辛溫散風邪故諸風痺痛欬嗽上氣頭痛脊強者宜之耑治少陰頭痛獨活爲使辛散浮熱故口瘡喉痺鼻淵齒齩者宜之辛益肝胆故胆虛驚癇風眼泪下者宜之水停

心下則腎燥細辛之辛能行水氣以潤之雖手少陰引經
乃足少陰本藥能通精氣利九竅故耳聾鼻癢鼻不聞香
風寒入腦故氣不通寒宜表熱宜清有瘰肉者爲末吹鼻
而愈倒睫便瀼者宜之散結溫經破痰下乳行血發汗能
發少陰之汗仲景治少陰症及發熱麻黃附子細辛湯乃
治邪在裏之表劑然味厚性烈不可過用至一錢多則氣
不通悶絕而死其味極辛產華陰者真揀去雙葉用惡黃
耆山菜畏硝石滑石反藜蘆

柴胡

味苦平微寒味薄氣昇爲陽主陽氣下陷能引清氣上行

而平少陽厥陰之邪熱肝胆心包三焦相火時珍曰行少
陽黃芩爲佐行厥陰黃連爲佐能宣暢氣血散結調經昂
按人第知柴胡能發表而不知柴胡能和裏故勞藥血藥
往往用之爲足少陽表藥治傷寒邪熱痰熱結實虛勞肌
熱嘔吐心煩諸瘧寒熱頭眩目赤胸痞脇痛口苦耳聾婦
人熱入血室胎前產後諸熱小兒痘疹五疳羸熱散十二
經痞疽血凝氣聚功同連翹但連翹治血熱柴胡治氣熱
也陰虛火炎氣昇者禁用銀州者根長尺餘微白治勞疰
良北產者如前胡而軟並良南產者強硬不堪用外感生
用內傷昇氣酒炒用根中及下降用備有汗欬者蜜水炒

前胡半夏爲使惡皂莢

續斷

味苦溫補腎辛溫補肝能宣通血脈而理筋骨主傷中補不足煖子宮縮小便破瘀血治腰痛胎漏崩帶遺精腸風血痢用平胃散一兩川續斷二錢半每服二錢米飲下治時痢亦驗癰痔腫毒又主金瘡折傷止痛生肌外科外科上劑川產者良狀如雞脚皮黃節斷者真去筋酒浸用地黃爲使必多用少則無功

延胡索

味苦而溫入手足太陰肺經脾經厥陰心包肝經能行血

中滯氣氣中血滯通小便除風痺治氣凝血結上下內外
諸痛通利則不痛也癥瘕崩淋月候不調氣血不和因而
凝滯不以時至產後血運暴血上衝折傷積血痼氣危急
爲活血理氣第一藥然辛溫走而不守獨用力迅宜兼補
血藥通經墮胎血熱氣虛者禁用根如半夏肉黃小而堅
者良酒炒行血醋炒止血生用破血炒用調血亦在人善
用之耳

紅花 古名紅藍花

味苦甘氣溫入肝經而破瘀血活血瘀血行則血活潤燥
消腫止痛治經閉便難血運口噤胎死腹中非活血行血

不能下痘瘡血熱喉痺不通又能入心經生新血須兼補
血藥爲佐使俗用染紅併作胭脂活血解毒痘疔挑破以
油胭脂點之良少用養血多則行血過用則血行不止而
死矣然血生於心包藏於肝屬於衝任紅花汁與血相類
故治血病耳

紫草

味甘鹹氣寒入厥陰血分心肝二經涼血活血利九竅通
二便治心腹邪氣水腫五疸瘡癰及痘瘡血熱毒盛二便
閉澇者用之瀉者忌用去頭鬚酒洗用血熱則毒閉得紫
草涼之則血行毒出大便利者忌之紫草性寒小兒脾實

者可用脾虛者反能作瀉矣

地榆

味苦酸氣微寒性沉而瀉本草未嘗言瀉然能收汗止血皆酸收斂之功也入下焦除血熱治吐衄崩中血虛忌用腸風血痢血鮮者爲腸風血瘀者爲藏毒積久而發也糞前爲近血出腸胃糞後爲遠血出肺肝若虛寒瀉痢及初起者忌用似柳根外黑裏紅取上截炒黑用之稍反行血得髮良惡麥冬

蒲黃

味甘氣平入厥陰心包肝血分之藥生用性滑行血消瘀

通經脈利小便祛心腹膀胱寒熱同五靈脂用治心腹血
氣痛名失笑散更療撲打損傷瘡癰諸痛炒黑性溫止一
切血崩帶泄精一婦人舌脹滿口以蒲黃頻搽比曉而愈
又宋度宗舌脹滿口用蒲黃乾姜末等分搽之愈時珍曰
觀此則蒲黃之涼血活血可知矣蓋舌爲心苗心包相火
乃其臣使得乾姜是陰陽相濟也

黃連

味大苦大寒入心瀉火鎮肝涼血燥濕開鬱解渴除煩益
肝胆厚腸消心瘵止盜汗涼心治腸澼瀉痢痞滿腹痛心
痛目痛皆傷人乳浸點或合歸芍等分煎湯熱洗散熱活

血癰疽瘡疥酒毒胎毒小兒初生甘草爲末蜜調令嚥之
明目定驚止汗解毒除疳同猪肚蒸爲丸殺虻虫然虛寒
爲病者禁用出宣州者粗肥出四川者瘦小狀如鷹爪連
珠者良去毛治心火生用虛火醋炒肝胆火猪胆汁炒上
焦火酒炒中焦火姜汁炒下焦火鹽水或童便炒食積火
黃土炒治濕熱在氣分吳茱萸湯炒在血分乾漆水炒點
眼赤用人乳浸黃芩龍骨爲使惡菊花玄參姜蚕白蘚皮
畏款冬牛膝忌猪肉殺烏頭巴豆毒黃連瀉心火佐以胆
草瀉肝胆火白芍瀉脾火石羔瀉胃火知母瀉腎火黃栢
瀉膀胱火木通瀉小腸火黃芩瀉肺火枝子佐之瀉大腸

火黃連佐之柴胡瀉肝胆火黃連佐之瀉三焦火黃芩佐之凡熱鬱惡心兀兀欲吐者用黃連數分服之甚效然實火宜瀉虛火宜補豈可盡用黃連可瀉哉况黃連大寒大冷之藥也若錯用之往往殺人清火之藥亦多立參桔梗黃芩枝子麥冬俱可用况不傷人何必用黃連哉今用黃連必用大補氣血之藥或熱藥之中方可生人矣

胡黃連

味苦寒去心熱益肝胆厚腸胃治骨蒸熱五心煩熱主消渴而多飲爲上消肺熱也心移熱於肺傳爲鬲消是也多食善饑爲中消胃熱也渴而小便數有膏爲下消腎熱而

水虧也五痔濕熱下流傷血分無所施洩則逼肛門而爲痔腫瘰癧瀉痢女人胎蒸消菓子積爲小兒驚疳良藥性味功用似黃連故名出波斯國今秦隴南海亦有之心黑外黃折之塵出如烟者真與其用川黃連之殺人不若用胡黃連平穩且不損矣

澤瀉

味甘淡微鹹入膀胱利小便瀉腎經之火邪功耑利濕行水治消渴痰飲嘔吐瀉痢腫脹水疝脚氣疝痛淋瀝陰汗遺尿洩精或問旣利水而又止洩精何也曰此乃濕熱爲病不爲虛滑者言也虛滑則當用補澁之藥濕熱之病濕熱

既除則清氣上行又能養五臟益氣力起陰氣補虛損止
頭旋有聰耳目之功多服昏目鹽拌或酒浸用忌鐵然此
藥乃瀉腎之藥必須加補腎之藥中可也至於利水之用
亦看人之虛實而善用之耳

車前草

味甘氣寒涼血去熱止吐衄瘕瘵明目通淋凡利水之劑
多損於目惟此能解肝與小腸之熱濕熱退而目清矣子
耳寒清脉肝風熱滲膀胱濕熱利小便而不走氣與茯苓
同功強陰益精令人有子治濕痺五淋暑濕瀉痢目赤障
翳催生下胎酒蒸搗餅焙研用

砂仁

味辛溫香補肺益腎和胃醒脾快氣調中通行結滯治腹
痛痞脹噎膈嘔吐上氣咳嗽赤白瀉痢霍亂轉筋奔豚崩
帶祛痰逐冷消食醒酒止痛安胎氣行則痛止氣順則胎
安又散咽喉口齒浮熱化銅鐵骨哽出嶺南炒研用

白豆蔻

味辛熱流行三焦溫煖脾胃三焦利脾轉諸症自平而爲
肺家本藥散滯氣消酒積除寒燥濕化食寬膨治脾虛瘧
疾感寒腹痛吐逆反胃肺胃火盛及氣虛者禁用白睛翳
膜太陽經目眦紅筋行氣煖胃出番產者良炒研用

肉豆蔻

味辛溫氣香理脾煖胃下氣調中逐冷祛痰消食解酒治積冷心腹脹痛挾痰挾食者並宜之中惡吐沫小兒吐逆乳食不下又能瀉大腸止虛瀉冷痢初起忌用出嶺南似草蔻外有皺紋內有班紋糯米粉裹煨熟用忌鐵

木香

味苦辛氣溫而香三焦氣分之藥能昇降諸氣泄肺氣疏肝氣和脾氣治一切氣痛九種心痛嘔逆反胃霍亂瀉痢後重癰閉痰壅氣結癖塊腫毒蠱毒衝脉爲病氣逆裏急殺鬼物瘴霧去腋臭實大腸消食安胎過服泄真氣番船

上來形如枯骨味苦粘舌者良磨汁用畏火體弱氣虛者
禁用

當歸

味甘苦辛氣溫入心肝脾三經補血養血活血和血潤燥
滑腸尾破血身活血助心散寒諸血屬心風通脈者必先
補心當歸苦溫助心心生血肝藏血脾統血爲血中氣藥
治虛勞寒熱欬逆上氣血和則氣降又治嘔瘧血痢頭痛
腰痛心腹諸痛風痺無汗痿痺癥瘕癰疽瘡瘍女人經行
小腹作痛及婦人諸不足一切血症陰虛陽虛潤腸胃澤
皮膚養血生肌血旺則肉長排膿止痛血和則痛止然滑

大腸瀉者忌用當歸爲君白芍爲臣地黃爲佐川芎爲使
名四物湯治血之總劑血虛加以人參黃耆血熱佐以條
芩梔連血積佐以大黃牽牛昂按血屬陰四物湯能養陰
陰得其養則血自生非四物能生血也若氣虛血弱之人
當用人參取陽旺生陰血之義多有過服四物湯陰滯之
藥而反致害者使氣血各有所歸故名血滯能通血虛能
補血枯能潤血亂能撫蓋其辛溫能行氣分使氣調而血
和也東垣曰頭止血而上行身養血而中守尾破血而下
流全活血而不走雷毀海藏並云頭破血時珍曰治上用
頭治中用身治下用尾通治全用一定之理也然川產力

大醫明
卷五
剛善攻秦產力柔善補以秦產頭圓尾多肥潤氣香者良
名馬尾歸尾粗堅枯者名鏡頭歸只宜發散用治血酒製
有痰姜製昂按當歸非治痰藥也姜製亦臆說耳畏菖蒲
海藻生姜惡濕麵

川芎

味辛溫氣昇浮爲少陽引經之藥入手足厥陰氣分心包
肝胆乃血中氣藥助清陽而開諸鬱丹溪曰氣昇則鬱自
降爲通陰陽氣血之使潤肝燥補肝虛肝以瀉爲補所謂
辛以散之辛以補之上行頭目下行血海衝脉搜風散瘀
止痛調經治風濕在頭血虛頭痛能引血下行頭痛必用

之加各引經藥太陽羌活陽明白芷少陽柴胡太陰蒼朮
少陰細辛厥陰吳萸丹溪曰諸經氣鬱亦能頭痛也又治
腹痛脇痛濕瀉血痢寒痺筋攣自汗多涕及癰疽瘡瘍癰
從六腑生疽從五臟生皆陰陽相滯而成也氣爲陽血爲
陰血行脉中氣行脉外相並周流寒熱搏之則凝滯而行
遲爲不及火熱搏之則沸騰而行速爲太過氣鬱邪入血
中爲陰滯於陽血鬱邪入氣中爲陽滯於陰致生惡毒然
百病皆由此起也川芎能和血行氣而通陰陽男婦一切
血症然香竄辛散能走泄真氣單服外服令人暴亡蜀產
爲川芎秦產爲西芎江南爲撫芎以川產大塊裹白不油

辛甘者勝白芷爲使畏黃連硝石滑石惡黃耆山茱萸然
肌瘦多火之人勞病吐血之人並禁用恐性燥動火也昂
按芍地酸寒爲陰芎歸辛溫爲陽故四物取其相濟以行
血藥之滯耳川芎辛散豈能生血乎治法云驗胎法婦人
過經三月用川芎末空心熱湯調服腹中微動者是胎不
動者是經閉也

白芍

味酸氣微寒入肝脾血分爲手足太陰行經藥瀉肝火安
脾肺固腠理肺主皮毛脾主肌肉肝木不尅土則脾安土
旺能生金則肺安脾和肺安則腠理固矣能和血脈收陰

氣斂逆氣散惡血利小便緩中止痛益氣除煩斂肝安胎
補勞退熱治瀉痢後重能除胃中濕熱脾虛腹痛然瀉痢
俱太陰病不可缺此若寒瀉冷痛忌用又治心病脇痛肺
脹喘噫癰腫疝瘕其收降之體又能入血海衝脉爲血海
男女皆有之又治鼻衄目赤瀉肝血不足婦人胎產及一
切血病又曰產後忌用者以其酸寒伐生發之氣也必不
得已酒炒用之可耳時珍曰產後肝血已虛不可更瀉也
同白朮補脾同參耆補氣同歸地補血同川芎瀉肝同甘
草止腹痛同黃連止瀉痢同防風發痘疹同姜棗溫經散
濕○赤芍藥主治畧同尤能瀉肝火散惡血治腹痛堅

積血痺疝瘕經閉腸風癰腫目赤皆散瀉之功白補而收
赤散而瀉產後忌用赤白各隨花色單攤者入藥酒炒用
製其寒婦人血分醋炒下痢後重不炒惡芒硝石斛畏鱉
甲小薊反藜蘆孕婦及氣血虛弱之人禁用其性大寒尅
伐元氣也

山藥

味甘氣平無毒色白入脾肺二經補其不足滌其虛熱陰
不足則內熱補陰故能清熱固腸胃潤皮毛化痰涎止瀉
痢滲濕故化痰止瀉百一方山藥半生炒米飲下治噤口
痢肺爲腎母故又益腎強陰治虛損勞傷王履云八味丸

用之以強陰脾爲心子又能益心氣治健忘遺精昂按山藥性瀉故治遺精泄瀉而諸家俱不言瀉也色白而堅者佳乃補腎水治腰痛之聖藥也

金銀花

味甘寒氣香入肺散熱化毒解毒補虛療風養血止渴治癰疽疔癤楊梅惡瘡腸澀血痢五種尸症○經冬不凋一名忍冬藤又名左纏藤花葉同功花香尤佳釀酒代茶蒸膏更妙花每收一觔泡酒喫之永不生瘡不出痘凡有腸癰背癰將金銀花大劑每日煎當茶服之自然消矣此藥無經不達多服將周身之毒氣化爲黃水從大小便而出

矣毒既化瘡又何從而生哉但世人只知花香可戴不知此藥大有益於人耳凡婦女乳上生瘡用銀花一兩生甘草三錢蒲公英一兩半水半酒煎服之自然消散矣

牛蒡子

味辛氣平無毒潤肺解熱散結除風利咽膈理痰嗽消斑疹利二便行十二經散諸腫瘡瘍之毒利腰膝凝滯之氣實如蒲萄而褐色酒拌蒸待有霜拭去用根苦寒竹刀刮淨絞汁蜜和服治中風汗出乃愈根搗爛和豬脂油貼瘡毒及反花瘡神效然性冷而滑利痘症虛寒泄瀉者忌用

補骨脂卽破故紙也

味辛苦氣大溫入心包命門補相火以通君火煖丹田壯元陽縮小便亦治遺尿治五勞七傷腰膝冷痛腎冷精流腎虛泄瀉婦人血氣墮胎。○出南番者色赤嶺南者色綠酒浸蒸用亦有童便乳浸鹽水炒者得胡桃胡麻良惡茸草。○凡腎虛則命門火衰不能薰蒸脾胃脾胃虛寒遲於運化以致飲食減少腹脹腸鳴嘔涎泄瀉如鼎釜之下無火物終不熟故補命門相火即所以補脾。○破故紙四兩五味三兩肉苁二兩吳茱萸一兩姜煮棗肉爲丸各四神丸治五更腎瀉。○唐鄭相國方用故紙十兩酒浸蒸爲末胡桃肉二十兩去皮研爛蜜和每日酒調一匙或水調服

白飛霞曰故紙屬火堅固元陽胡桃屬水潤燥養血有
水火相生之妙忌芸苔羊血加杜仲名青娥丸

梔子

味苦寒無毒輕清而浮也入心肺二經瀉邪熱三焦之火
利小便治鬱火吐血衄血淋血痢心煩不眠五黃五淋亡血
津枯口渴目赤紫癥白癩瘡瘍生用瀉火炒黑止血姜汁
炒止煩嘔內熱用仁表熱用皮○或問梔子乃大寒大冷
之藥何以用之利小便乎○曰利小便之藥非利小便乃
肺清則化行而膀胱津液之腑得此氣化而出也○丹溪
曰治心痛當分久新若初起因寒因食宜當溫散久則得

而成熱若用溫劑不助痛添病乎古方多用梔子爲君熱藥爲之嚮導則邪易伏此病雖日久不食若痛止恣食病必再作也○最清胃腕之血炒黑末服吹鼻治衄血○本草言治實火之血順氣爲先氣行則血自歸經治虛火之血養正爲先氣壯自能攝血○丹溪曰治血不可單行單止亦不可純用寒藥○仲景用梔子豆豉湯治煩燥何也曰煩者氣也燥者血也故用梔子以治肺煩香豉治腎燥亦用作吐藥以邪在上焦吐之則邪自散經所謂其高者因而越之也

猪苓

味苦微甘氣淡無毒入膀胱腎經可昇可降泄滯利竅助陽開腠發汗利便行水與茯苓同而不補治傷寒溫疫大熱懊懣消渴腫脹淋濁瀉痢痰瘧。凡瘧多由暑暑必兼濕經曰夏傷於暑秋必發瘧也。然耗津液多服損腎昏目腎水不足則目昏仲景五苓散猪苓茯苓澤瀉白朮肉桂爲治水之總劑。昂按經曰膀胱者州都之官津液藏焉氣化則能出矣用肉桂辛熱引入膀胱所以化其氣也除桂名四苓散經曰五苓散能生津液亦通大便曾世榮治驚風亦用五苓散。曰茯苓安心神澤瀉導小使小腸利而心氣平矣然此藥多生於楓樹下塊如猪屎故名猪

苓肉白而實者良去皮用

桑寄生

味苦甘氣寒可昇可降無經不達能堅腎助筋骨散風濕固齒長髮益血止崩漏下乳安胎外科散瘡瘍追風濕他樹多寄生以桑上採者爲真雜樹恐反有害莖葉並用忌火然單用則無功效必須加入補氣血藥中方妙也

兔絲子

味甘辛氣平入脾肝腎三經強陰益精溫而不燥不助相火又能治五勞七傷精寒泄瀉口苦燥渴祛風明目補衛氣助筋脉益氣力肥健人其藥無根蔓延草上子黃如黍

粒得酒良淘去泥沙酒浸一宿暴乾研末用單用無功加
入山藥熟地茯苓大補腎之藥內方見奇功耳

茵陳蒿

味苦氣寒無毒入足太陽膀胱經去水濕發汗利水泄太
陰陽明之濕熱治疸黃之君藥脾胃有濕熱則發黃黃者
脾之色也熱甚者身如橘色汗如栝汁亦有寒濕發黃身
薰黃而色暗大抵治以茵陳爲主陽黃加大黃梔子陰黃
加附子乾姜各隨寒熱治之又治傷寒時疾狂熱痺頭
痛頭旋女人瘕疝之病○然茵陳單用力薄不能取盛凡
有黃疸之症用茵陳一兩猪苓一兩赤茯苓一兩胆草二

兩澤瀉五錢甘草三錢同煎服之則黃疸全消矣茵陳之妙如此要在乎人之善用也

青箱子一名草決明

味苦微寒入厥陰肝經祛風熱鎮肝明目治青盲障翳虫疥惡瘡瞳子散大者忌服能助陽火類鷄冠而穗尖長

決明子

味甘苦鹹氣平入肝經除風濕治一切目疾故有決明之名又曰益腎精瞳子神光屬腎自華曰明目勝於黑豆作枕治風狀如馬蹄俗呼馬蹄決明搗碎煎惡火麻仁

山豆根

味苦寒瀉熱解毒瀉心火以保金氣去肺大腸之風熱心
火降則不灼肺而金清肺與大腸相表裏金清則大腸亦
清消腫止痛治喉癰喉風齧腫齒痛喘滿熱咳腹痛下痢
五疔諸瘡解諸藥毒傳禿瘡蛇狗蜘蛛傷瘵人馬急黃血
熱極所致苗如豈經冬不凋然陰虛火動氣血兩虛之人
忌用乃剋伐之藥只宜於實火不宜於虛火實火宜瀉虛
火宜補也

芫花

味苦溫有毒去水飲痰癖瘵水腫在五臟皮膚脹滿喘急
痛引胸脇咳嗽瘰癧葉似柳二月開花紫白色葉生花落

陳久者良醋煮過水浸暴用根療疥反甘草○仲景治傷寒太陽症表未解心下有水而咳乾嘔發熱或喘或利者小青龍湯主之表已解有時頭痛出汗惡寒心下有水乾嘔痛引兩脇或喘或咳者十棗湯主之蓋青龍散表邪使水從汗出經所謂開鬼門也十棗逐裏邪使水從二便出內經所謂潔淨府去陳莖法也十棗湯芫花甘遂大戟等分棗十枚也

常山

味辛苦而寒有毒能引吐行水祛老痰積飲專治諸瘧能損人真氣弱者忌用形如鷄骨者良酒浸蒸或炒用瓜萋

爲使忌葱茗莖葉各蜀漆功用畧同古方有蜀漆散取其
苗性輕揚發散上焦邪結甘草水拌蒸用○然世人只知
常山吐痰之藥殊不知亦下痰之藥也然痰有六風痰寒
痰濕痰熱痰食痰氣痰也飲有五流於肺爲支飲於肝爲
懸飲於心爲伏飲於經絡爲溢飲於腸胃爲痰飲也常山
力能吐之下之○時珍曰常山蜀漆劫痰截瘧須在發散
表邪及提出陽分之後用之然瘧有經瘧藏瘧風寒暑濕
痰食瘴鬼之別須分陰陽虛實不可概論常山蜀漆得甘
草則吐得大黃則利得烏梅川山甲則入肝得小麥則入
心得麻黃則入肺得龍骨附子則入腎得草果檳榔則入

脾蓋無痰不作瘧也常山吐發唯在生用多用爲然與其
草同用亦必吐若酒浸炒透但用錢許每見竒功未見其
或吐也○常山吐瘧痰瓜蒂吐熱痰烏附尖吐濕痰萊菔
子吐氣痰藜蘆吐風痰然常山吐痰之功雖如此亦看人
之虛實而善用之也若陰虛火動人之咳嗽吐痰必須滋
陰降火順氣化痰爲主而痰火使能消也

瞿麥

味苦氣寒降心火利小腸逐膀胱邪熱爲治淋要藥故八
正散用之五淋大抵皆屬濕熱熱淋者八正及山梔滑石
之類血淋宜小蘗牛膝膏腎虛淋宜補腎不可獨瀉老人

氣虛者宜參朮帶木通山梔亦有痰滯中焦作淋者宜行
痰兼通利藥最忌發汗若汗之必便血也又能破血利竅
散癰消腫明目去翳通經墮胎性利善下虛者慎用然心
經雖有熱而小腸虛者服之則心熱未清而小腸別作病
也其花大如錢紅白班蘭色甚娥媚俗呼洛陽花也若產
後之淋當去瘀血瞿麥蒲黃皆爲要藥也

石斛

味甘淡微鹹氣平無毒入脾腎除虛熱瀉元氣益精強陰
煖水臟平胃氣補虛勞壯筋骨療風痺脚弱發熱自汗夢
遺滑精囊泄餘瀝光澤如金釵短而中實生石上者良名

金釵石斛長而虛者名水解不堪用去頭根酒浸用惡巴
豆畏蠶蚕細剉水浸熬膏更良也

菱鞋

味甘氣平無毒補中益氣潤心肺悅顏色除煩渴治風濕
濕毒目痛背爛寒熱痞瘧中風暴熱不能動搖頭痛腰痛
自汗一切不足之症用代參著不寒不燥大有殊功似黃
精而差小黃白多鬚二藥功用相近而菱鞋更勝用竹刀
刮去皮節蜜水或酒浸蒸用然陰虛火動者慎用其藥性
燥必加入滋補藥中可也

款冬花

味辛氣溫無毒陽也瀉熱潤肺消痰定驚明目治咳逆上
氣喘渴喉痺肺痿肺癰咳吐膿血爲治咳要藥寒熱虛實
皆可施用十一二月開花如黃菊微見花未舒者良生河
北關中甚多以枇杷花僞之揀淨花甘草水浸一宿暴用
得紫苑良杏仁爲使惡皂莢硝石玄參畏黃耆貝母連翹
麻黃青箱辛夷雖畏貝母得之反良世以百合欬冬等分
蜜丸名百花膏治咳嗽痰血甚效凡陰虛勞嗽多用冬花
紫苑百部百合沙參生地麥冬五味知栢苓芍如內熱骨
蒸加丹皮地骨皮若嗽而復瀉者爲肺移熱於大腸臟腑
俱病嗽而發熱不止者爲陰虛火咳皆難治必用八味地

黃湯滋陰降火方可取效也

蒼耳子

味其苦性溫善發汗散風濕上通老頂下行脚膝外達皮膚又治頭痛目暗齒痛鼻淵肢攣痺痛瘰癧瘡疥採根葉熬膏名萬應膏遍身瘙癢作浴湯佳去刺酒拌蒸忌豬肉各處俱產皆可用

益母草

味辛微苦寒無毒入手足厥陰心包肝經消水行血去瘀生新調經解結又治血風血運血痛血淋胎漏產難崩中帶下爲經產良藥消疔腫乳癰通大小便然辛散之藥瞳仁

散大者忌服益母草者言其大有益於婦女者也調經益
精明日活血順氣逐風氣行則血行血活則風散行中有
補治心煩頭痛胎產芾崩久服令人有子忌鐵子微炒用
益母根莖花葉實皆可同用若治瘡腫胎產消水行血則
宜並用若治血分風熱明目調經用子爲良蓋根莖花葉
專於行子則行中有補也小暑端陽或六月六日採益母
莖葉花實爲末蜜丸治胎產百病或搗汁熬膏亦良

芭蕉根

味甘氣大寒治天行熱狂煩悶消渴產後血脹並搗汁服
塗癰腫結熱爲末油調敷之